



Proxecto de Decreto polo que se regula a concesión de condecoracións, distintivos de permanencia e distincións honoríficas outorgadas ao persoal da Unidade do Corpo Nacional de Policía adscrita á Comunidade Autónoma de Galicia, ou a persoas e institucións que colaboren coa mesma

Mediante unha Orde de data 19 de xuño de 1991, do Ministerio do Interior, creouse a Unidade do Corpo Nacional de Policía adscrita á Comunidade Autónoma de Galicia, de conformidade asemade co previsto no artigo 27.25 do Estatuto de Autonomía da Comunidade Autónoma de Galicia, así como no artigo 47 da Lei orgánica 2/1986, do 13 de marzo, que establece a adscrición de unidades do Corpo Nacional de Policía ás Comunidades Autónomas.

En relación co anterior, o Real decreto 221/1991, do 22 de febreiro, coa modificación operada polo Real decreto 1089/2000 do 19 de xuño, regulou a organización das unidades do Corpo Nacional de Policía adscritas ás Comunidades Autónomas e estableceu as peculiaridades do réxime estatutario do seu persoal. Neste marco se asinou un acordo administrativo de colaboración entre o Ministerio do Interior e a Xunta de Galicia en materia policial, para a adscrición dunha unidade do Corpo Nacional de Policía á Comunidade Autónoma de Galicia.

A competencia da xestión funcional desta unidade corresponde á Vicepresidencia e Consellería de Presidencia, Administracións Públicas e Xustiza, segundo os artigos 26.2.B.a) e g) ; e tamén o artigo 29.1.d) e i) do Decreto 72/2013, do 25 de abril, polo que se establece a estrutura orgánica da Vicepresidencia e Consellería de Presidencia, Administracións Públicas e Xustiza, no que se recolle que corresponde á Dirección Xeral de Emerxencias e Interior, entre outras funcións, o exercicio das competencias en materia de persoal policial adscrito á Comunidade Autónoma, como é o caso do persoal da devandita unidade.



A punto de cumprirse o 25º aniversario dende a constitución da Unidade do Corpo Nacional de Policía adscrita á Comunidade Autónoma de Galicia, e por

se ter amosado en moitas actuacións policiais a entrega, profesionalidade, valor e compromiso dos seus membros, considérase necesario establecer un sistema de recoñecemento público aos méritos que poida acreditar o persoal desta unidade, tanto por razón de servizos ou intervencións extraordinarios, como asemade polo tempo de permanencia na dita unidade.

Resulta xa que logo necesario crear unha serie de condecoracións como recoñecemento público a servizos meritorios de carácter extraordinario, que preste o persoal da Unidade do Corpo Nacional de Policía adscrita á Comunidade Autónoma de Galicia, que tivesen lugar en beneficio da seguridade pública, así como tamén ao servizo continuado nesta unidade, garantindo o exercicio e o respecto dos dereitos e liberdades da cidadanía.

Ao obxecto de outorgar o recoñecemento a esa actividade realizada polo persoal da Unidade, cando exceda con carácter extraordinario do seu normal cumprimento profesional, en beneficio da liberdade, seguridade e convivencia da cidadanía, ou tamén pola súa constancia e dedicación ao servizo dentro da propia unidade, créanse as condecoracións e distintivos de permanencia recollidos neste decreto.

Se establece ademais unha distinción honorífica para aquelas persoas, colectivos ou institucións que teñan manifestado unha constante ou importante labor de apoio e colaboración ao persoal da unidade, no exercicio das súas funcións, favorecendo dese xeito a eficacia das mesmas e facilitando asemade a prestación dun servizo de máis calidade.



Establécense no decreto, xa que logo, tres condecoracións, tres distintivos de permanencia no servizo e unha distinción honorífica:

- a) Cruz de ouro da Xunta de Galicia ao mérito policial.
- b) Cruz de prata da Xunta de Galicia ao mérito policial.
- c) Cruz de bronce da Xunta de Galicia ao servizo policial.
- d) Distintivo azul de permanencia de máis de 25 anos de servizo na Unidade.
- e) Distintivo amarelo de permanencia de máis de 20 anos de servizo na Unidade.
- f) Distintivo branco de permanencia de máis de 15 anos de servizo na Unidade.
- g) Distinción honorífica.

As cruces, nas súas modalidades de ouro e prata, están dirixidas ao recoñecemento de servizos meritorios e extraordinarios prestados polo persoal da Unidade do Corpo Nacional de Policía adscrita á Xunta de Galicia, xa sexa a título persoal ou a grupos ou seccións da mesma de xeito colectivo, neste caso con recoñecemento e uso da distinción a título individual polo persoal. A cruz de bronce recoñece a permanencia na unidade e a dedicación profesional ao servizo na mesma durante 30 anos. Os distintivos de permanencia, nas tres modalidades, premian a prestación de servizos na unidade de máis de 15, 20 e 25 anos respectivamente.

A distinción honorífica salientará o traballo daquelas persoas, organismos ou institucións, que contribuísen á seguridade pública na Comunidade Autónoma de Galicia, apoiando e colaborando sen interese algún nas funcións que desenvolve a Unidade do Corpo Nacional de Policía adscrita á Comunidade Autónoma de Galicia, contribuíndo dese xeito ao mantemento da liberdade e seguridade da cidadanía.

Na súa virtude, por proposta do Vicepresidente e Conselleiro de Presidencia, Administracións Públicas e Xustiza, de acordo co ditame do Consello Consultivo de Galicia, e logo da deliberación do Consello da Xunta de Galicia na súa reunión do día ... de de.....,



DISPOÑO:

Artigo 1. Obxecto

Constitúe o obxecto deste decreto establecer unha serie de condecoracións, distintivos e distincións honoríficas, que permita ao Goberno galego recoñecer publicamente e distinguir tanto as actuacións destacadas do persoal da Unidade do Corpo Nacional de Policía adscrita á Comunidade Autónoma de Galicia, ou a prestación de servizos por tempo continuado na mesma, como a labor desinteresada de apoio e colaboración co persoal desta unidade por parte de persoas, colectivos ou institucións alleas á mesma, que de xeito recorrente ou en ocasións sinaladas, prestasen un servizo salientable ou facilitasen de maneira notoria o desenvolvemento do labor policial.

Artigo 2. Condecoracións, distintivos de permanencia e distincións

1. Establécense as seguintes condecoracións, distintivos de permanencia e distincións:

- a) Cruz de ouro da Xunta de Galicia ao mérito policial.
- b) Cruz de prata da Xunta de Galicia ao mérito policial.
- c) Cruz de bronce da Xunta de Galicia ao servizo policial.
- d) Distintivo azul de permanencia de 25 anos de servizo na unidade.
- e) Distintivo amarelo de permanencia de 20 anos de servizo na unidade.
- f) Distintivo branco de permanencia de 15 anos de servizo na unidade.
- g) Distinción honorífica.

2. As cruces ao mérito outorgaranse ao persoal da Unidade do Corpo Nacional de Policía adscrita á Comunidade Autónoma de Galicia, sexa a título individual ou colectivo, neste caso con recoñecemento e uso da distinción a título individual polo persoal participante.

Estas condecoracións non poderán outorgarse ao persoal da Unidade en cuxo expediente consten anotacións desfavorables sen cancelar por falta grave ou moi grave. Se require asemade non estar sometido a procesos penais nin a expediente disciplinario polas indicadas faltas, na data de cumprimento dos



requisitos para a súa concesión e durante a tramitación administrativa correspondente.

4. A Cruz de bronce ao servizo policial premiará a permanencia na unidade e a dedicación profesional por máis de 30 anos.

5. Os distintivos de permanencia entregaranse ao persoal que cumpra máis de 15, 20 e 25 anos de servizo na unidade, segundo proceda.

6. A distinción honorífica do apartado g) está destinada a salientar a labor de persoas, institucións e organismos, polas súas actividades de apoio e colaboración co persoal da Unidade do Corpo Nacional de Policía adscrita á Comunidade Autónoma de Galicia.

Artigo 3. Cruz de ouro da Xunta de Galicia ao mérito policial

A Cruz de ouro da Xunta de Galicia ao mérito policial outorgarase nos seguintes casos:

1. Resultar falecido en acto de servizo ou con ocasión del, sen menoscabo do honor, nin por imprudencia, impericia ou accidente.
2. Resultar con mutilacións ou feridas graves das que quedaren deformidade ou inutilidade que provocasen incapacidade para o servizo, concorrendo as mesmas condicións sinaladas no parágrafo anterior.

Artigo 4. Cruz de prata da Xunta de Galicia ao mérito policial

A Cruz de prata da Xunta de Galicia ao mérito policial outorgarase nos seguintes casos:

1. Como consecuencia de accións policiais nas que se evidencie unha actuación profesional de especial relevancia, concorrendo algunha das circunstancias seguintes:
 - a) sobresaínte valor persoal
 - b) risco significativo para a súa vida ou integridade física
 - c) manifestación excepcional de sacrificio ou abnegación.
2. Dirixir, executar ou participar con éxito en servizos de extraordinaria dificultade ou importancia, nos que se evidencien especiais cualidades profesionais.

Artigo 5. Cruz de bronce da Xunta de Galicia ao servizo policial



A Cruz de Bronce da Xunta de Galicia ao servizo policial outorgarase ao persoal que acredite trinta anos de servizo na unidade, sen que lle consten antecedentes desfavorables no seu expediente persoal, que evidencie unha traxectoria profesional prolongada no tempo e contribúa á dignificación, prestixio e recoñecemento público da función policial.

Artigo 6. Distintivos de permanencia

1. Os distintivos de permanencia entregaranse ao persoal que se atope prestando servizo ou en segunda actividade con destino na unidade, que cumpra os anos de servizo efectivo que se mencionan no apartado seguinte.
2. O distintivo de cor branca entregarase a quen acredite máis de 15 anos de servizo; o distintivo de cor amarelo a quen acredite máis de 20 anos; e o distintivo de cor azul máis de 25 anos, sen que se precise en ningún caso que o servizo se prestase de forma ininterrompida.
3. Estes distintivos se incorporarán nun soporte ao efecto, que simbolice a Unidade de Policía Adscrita á Comunidade Autónoma de Galicia, e que o persoal portará na súa uniformidade, de acordo co previsto nestes casos na normativa sobre distincións e condecoracións.

Artigo 7. Distinción honorífica

1. A distinción honorífica outórgase a aquelas persoas, organismos e institucións, como recoñecemento ao seu labor de especial colaboración en defensa da seguridade pública e da liberdade, en apoio da función policial da Unidade do Corpo Nacional de Policía adscrita á Comunidade Autónoma de Galicia.
2. Pode outorgarse tamén ao persoal ou a unidades doutros corpos ou colectivos como recoñecemento á súa destacada colaboración co persoal da Unidade.
3. Esta distinción terá formato de medalla cando sexa outorgada a título individual, e de placa cando sexa outorgada a título colectivo, que tamén poderá revestir a forma de gravata para os guións ou as bandeiras daqueles corpos ou unidades que dispoñan deles.



Artigo 8. Efectos das condecoracións

1. As condecoracións e distincións que se recollen nesta norma non implican pensión algunha a cargo da Xunta de Galicia.
2. Dentro do Acordo de Produtividade da UPA, se recollerá un apartado específico para recoñecer a traxectoria profesional do persoal funcionario que sexa condecorado coa Cruz de bronce.
3. As condecoracións e os distintivos se considerarán mérito preferente para poder optar a prazas ou destinos concretos dentro da Unidade, atendendo de ser necesario á tipoloxía dos mesmos e á data da súa concesión, especificando en cada convocatoria o baremo outorgado a cada condecoración ou distintivo.
4. Cando a persoa condecorada coa Cruz de ouro ou prata fose sancionada por faltas graves ou moi graves cometidas posteriormente, ou penada por delito doloso, a autoridade que a concedeu, logo da instrución dun expediente no que se dará audiencia obrigada á persoa interesada, poderá acordar a prohibición do uso das condecoracións outorgadas e mesmo a súa revogación.

Artigo 9. Procedemento para a concesión

1. A elaboración das propostas do persoal a distinguir corresponderá ás xefaturas provinciais ou locais de destino do persoal que, unha vez efectuadas, convocarán aos representantes das Organizacións Sindicais, dándolles traslado das mesmas. Se a proposta fora por un feito concreto informarase puntualmente sobre o mesmo.
2. Establécese un prazo de 10 días para que as Organizacións Sindicais presenten por escrito cantas alegacións crean convenientes respecto das propostas, ou tamén para formular propostas de distinción respecto doutro persoal que consideren merecedor de condecoración e non figure entre as tramitadas pola xefatura, xuntando a tal efecto as xustificacións que estimen oportunas.
3. Cumprido o anterior, os xefaturas das sedes remitirán ao Comisario xefe as propostas correspondentes, incluídas aquelas procedentes das organizacións sindicais, co fin de que este poida resolver acerca da súa tramitación ou non, dando conta de tal decisión á organización sindical que as houbera presentado, para posibles alegacións no prazo de cinco días.



4. Cumprido o trámite de alegacións, a Xefatura da Unidade elaborará unha proposta fundamentada, con indicación das que for consensuadas e daquelas da que non se teña consenso, e remitirá todo o actuado ao órgano directivo competente para a resolución que proceder.
5. A persoa titular da consellería da que dependa a unidade policial ditará a resolución que corresponda e que porá fin ao actuado.

Artigo 10. Publicidade

A concesión das condecoracións, distintivos de permanencia ou distincións honoríficas farase mediante unha Orde da Consellería competente en materia de seguridade, que será publicada no Diario Oficial de Galicia.

Artigo 11. Rexistro de condecoracións, distintivos de permanencia e distincións

1. A Dirección xeral ou órgano directivo correspondente, con competencias sobre a Unidade do Corpo Nacional de Policía adscrita á Comunidade Autónoma de Galicia, levará un rexistro onde figuren data da entrega, nome e apelidos das persoas galardoadas, Documento Nacional de Identidade ou carné profesional, destino e tipo de recoñecemento. O rexistro incluírá o expediente persoal que motivou a súa concesión.
2. En todo caso, adoptaranse as medidas que resulten necesarias para asegurar a confidencialidade, seguridade e integridade dos datos que figuren no Rexistro, de conformidade co previsto na Lei Orgánica 15/1999, do 13 de decembro, de Protección de Datos de Carácter Persoal.
3. Tamén se terá en conta a previsión contida no apartado 2 do artigo 8 deste decreto respecto do complemento de produtividade do persoal da UPA ao que se lle concedese á medalla de bronce.

Artigo 12. Acto de entrega

1. A entrega destas condecoracións, distintivos de permanencia e distincións desenvolverase nun acto público, que terá carácter anual e cuxa data se determinará mediante Orde da Consellería con competencias na materia de seguridade.



Artigo 13. Ámbito temporal

1. As condecoracións, distintivos de permanencia e distincións honoríficas entregaranse con carácter anual, a partir da entrada en vigor deste decreto, sen que se poidan ter en conta outros feitos, méritos ou circunstancias acaecidos fóra do ano natural obxecto de avaliación e anteriores ao mesmo, agás cando se trate de recoñecer unha traxectoria ou permanencia no servizo.
2. Só poderá optar a estas condecoracións e distintivos de permanencia o persoal que se atope prestando servizo na Unidade á entrada en vigor deste decreto.
3. No caso dos distintivos de permanencia computáranse os períodos continuados e descontinuos na prestación de servizo na Unidade, e superar os límites marcados segundo o distintivo de que se trate, podendo atoparse en activo ou segunda actividade.

Disposición transitoria primeira.- Persoal en segunda actividade

O persoal que á entrada en vigor deste decreto se atope en situación de segunda actividade sen destino, poderá optar aos distintivos de permanencia só por unha vez, sen que lle computen a estes efectos os anos que tivese completado nesta situación.

Disposición transitoria segunda.- Distincións colectivas

No caso de que a Unidade, a título colectivo, tivese sido distinguida coa Medalla de Galicia, ou outra distinción desas características, se procurará que o persoal, do que resulte acreditada a súa participación nos feitos ou servizos motivo do outorgamento desa distinción, poida portar na súa uniformidade de gala un símbolo da mesma en forma de pin, emblema ou semellante.

Disposición derradeira primeira. Desenvolvemento normativo

Facúltase á persoa titular da Vicepresidencia e Consellería de Presidencia, Administracións Públicas e Xustiza, ou a que resultase competente na materia no seu caso, para ditar as disposicións necesarias para o desenvolvemento do



presente Decreto, tanto no que se refire ao deseño e características das condecoracións, distintivos de permanencia, distinción honorífica e dos diplomas ou certificados acreditativos dos mesmos, como naqueloutros aspectos que se deriven da súa concesión.

Disposición derradeira segunda. Entrada en vigor

Este decreto entrará en vigor o día seguinte ao da súa publicación no Diario Oficial de Galicia.

Santiago de Compostela, de xuño de 2016

Alberto Núñez Feijóo

Presidente

Alfonso Rueda Valenzuela

Vicepresidente e Conselleiro de Presidencia, Administracións Públicas e Xustiza